

Pripremni sastanak “Buldožer odbora”

Prvi zamjenik visokog predstavnika Donald Hays je jučer predsjedavao sastankom na kome su učestvovali čelnici najuspješnijih preduzeća i strani ulagači, a koji je predstavljao pripremu prvog sastanka Odbora za uklanjanje zakonskih i drugih prepreka (“Buldožer odbora”) koji je visoki predstavnik Paddy Ashdown inicirao kako bi se uklonile sve prepreke rastu privrede i mogućnostima zapošljavanja.

Cilj sastanka je bio da se identificiraju glavne prepreke i promjene u zakonodavstvu koji bi rezultirale uspješnijim privrednim aktivnostima. Naglasio je da Bosna i Hercegovina mora brzo postati konkurentnija te potrebu domaćeg rasta kako bi se tokom narednih nekoliko godina njena privreda preobrazila u izvoznu privredu. Podsjetio je da je zadatak koji leži pred nama identificiranje prepreka koje stoje na putu u svrhu njihovog uklanjanja.

Na sastanku se razgovaralo o osnovnim problemima kao što su dvostruko oporezivanje, činjenica da se preduzeća koja su registrirana u jednom entitetu u drugom entitetu tretiraju kao strana preduzeća, te uvjet da preduzeća koja posluju na cijelom teritoriju BiH moraju dva puta izvršiti povrat poreza na dohodak preduzeća.

OHR će sada raditi na izradi paketa mikro reformi usmjerenih na otklanjanje prepreka koje postavljaju zakoni i propisi o poslovanju u oba entiteta, te na pojednostavljenje i usklađivanje propisa kako bi na taj način preduzeća mogla lakše investirati i otvarati nova radna mjesta. Ovo će biti prezentirano na prvom sastanku “Buldožer odbora” u narednih 10 dana.